

был еще не женат. И изыде на стретение святого Николина образа, и виде от образа свет неизреченно сияющъ, и принесе в область свою с радостию. И купно с отцем своим с князем Юрьем создаста храм во имя чудотворца Николы, и поставиша в нем той чудотворный образ, иде же и донныне содеваются чудеса велия. Егда же князь Феодор женися и роди сына Ивана,— и в лето 6745 убиен бысть князь Феодор Юрьевич^а от безбожнаго царя Батыя на реке на Воронеже, послан бо бысть отцем своим к нему з дары. Егда же услыша княгиня его Еупраксия убиение мужа своего князя Феодора Юрьевича, держащу ей в то время сына своего на руку, и ринуся с высоты храма на землю и заразися до смерти, и с сыном своим Иваном. И сея ради вины место то имянуется Заразск; ныне же град камен.^б

[л. 341:]

^в Того же лета приидоша от восточныя страны на Резанскую землю лесом безбожнии татарове с царем своим Батыем. И пришедше поплениша и пожгоша по Онозе. И послаша послы своя к резанским князем Юрью и к Олгу Ингоровичем, и к прочим князем, просяще десятины во всем— в князех, и в людех, и в конех, и в доспесех. Князи же резанстии, и муромстии совокупившеся выидоша в Воронеж, и послаша к великому князю Юрью Всеволодичю в Володимер, и к прочим, просяще помощи. Они же сами не поидоша, ни людей воинских не послаша, но хотеша особь сотворити брань. Гневу бо божию кто противитися может: недоумение бо, и грозу, и страх, и трепет наведе на ны за грехи наша, и поглощенна бысть премудрость могущих строити ратная дела, и крепких сердца в слабость женскую преложишася. И ни един князь друг другу помогаше. И одолеша окаяннии татарове на бою резанских, и муромских, и пронских князей,— избиша, и прогнавше, и землю всю поплениша, и пожгоша, и град столный Резань пришедше взяша, и пожгоша декабря в 21 день. А князя Юрья Ингоровича, и княгиню его, и иных князей, и всех людей избиша, и иноческий чин, и инокини, и жены, девицы избиваху, и позоры всякие творяху, его же и рещи не мощно. И монастыри, и церкви пожгоша; епископа же соблюде бог: отъеха в то время. Под Коломною же убиша князя Романа Ингоровича, а князь Всеволод из под Коломны в мале дружине учете к отцу великому князю Юрью в Володимер. Татаровя же пришедше взяша Москву....^г

^а Приписано вверху: резанский.

^б Внизу л. 335 об. приписано: И тогда царь Батый пленил Резанскую землю и князя Юрья Игоревича Резанского и братьей его побил, и сына его князя Феодора убил на Воронеже и многия руския грады разорил.

^в На поле киковарью: О Батыеве приходе.

^г Приписка внизу листа 341: 6745 убиен бысть благоверный и великий князь Феодор Юрьевич Резанской на реке на Воронеже от царя Батыя. И тогда Батый пленил Резанскую землю, и князя Феодорова отца князя Юрья Ингоровича Резанского и братию его побил, и потом многия руския грады разорил.